

明史本紀

乾隆四十二年補纂

明史卷十三

本紀第十三

總裁官總事務

經筵講官保兼李太保保親大學士兼管吏部戶部尚書事六級張廷玉等奉

敕修

憲宗一

癸未歲日當食不食五月丁巳大風雨雪

憲宗繼天凝道誠明仁敬崇文肅武宏德聖孝純皇帝
諱見深英宗長子也母貴妃周氏初名見濬英宗留衛
拉特皇太后命立爲皇太子景泰三年廢爲沂王天順
元年復立爲皇太子改名見深天順八年正月英宗崩
乙亥卽皇帝位以明年爲成化元年大赦天下免明年
田租三之一詔浙江江西福建陝西臨清鎮守内外官

諸邊鎮守內官正統間所無者悉罷之下番使者緝事
官校皆召還二月丙申都御史李賓等劾指揮僉事門
達恃恩不法下獄戍邊庚子始以內批授官三月甲寅
朔尊皇后爲慈懿皇太后貴妃周氏爲皇太后戊午放
宮人丙寅毀錦衣衛新獄庚午賜彭教等進士及第出
身有差癸酉詔內閣九卿考覈天下方面官戊寅復立
團營夏四月癸未朔日當食不見五月丁巳大風雨雹
敕羣臣修省庚申葬睿皇帝于裕陵秋七月壬申立吳
氏爲皇后八月癸未御經筵甲申命儒臣日講癸卯廢
皇后吳氏下太監牛玉于獄冬十月壬辰立王氏爲皇

后甲辰立武舉法十二月甲辰免京官雜犯罪是年兩
畿川廣荆襄盜賊大起道路不通安南烏斯藏入貢
成化元年春正月乙卯享太廟己未大祀天地于南郊
甲子命都督同知趙輔爲征夷將軍充總兵官僉都御
史韓雍贊理軍務討廣西叛徭二月戊子祭社稷己丑
詔雪于謙冤甲午耕藉田三月庚戌四川山都掌蠻叛
丁巳釋奠于先師孔子夏五月辛酉大雨雹壬戌避正
殿減膳敕羣臣修省甲子四川盜趙鐸作亂官軍擊斬
之秋七月己酉免天下軍衛屯糧十之三甲子振兩畿
浙江河南饑八月丁丑命工部侍郎沈義僉都御史吳

琛振撫兩畿饑民辛巳瘞暴骸庚寅瑪拉噶犯延綏總
兵官房能敗之冬十二月癸卯命撫寧伯朱永爲靖虜
將軍充總兵官太監唐慎監軍工部尙書白圭提督軍
務討荆襄賊是月韓雍大破大藤峽徭改名峽曰斷藤
是年琉球哈密瓜哇烏斯藏入貢

二年春正月戊申罷團營乙卯大祀天地于南郊辛酉
英宗神主祔太廟二月癸未命禮部侍郎鄒幹巡視畿
內饑民三月甲辰賜羅倫等進士及第出身有差己酉
李賢父卒乞終制不許乙卯朱永大破荆襄賊劉通于
南漳閏月癸酉振南畿饑乙未朱永擊擒劉通其黨石

龍道轉掠四川夏五月癸酉修撰羅倫以論李賢起復
謫福建市舶司提舉己卯禁侵損古帝王忠臣烈士名
賢陵墓六月甲辰趙輔師還乙巳免今年天下屯糧十
之三壬子命楊信爲平虜將軍充總兵官太監裴當監
督軍務禦寇延綏秋七月辛巳封弟見治爲忻王見沛
徽王戊戌瑪拉噶犯固原八月丁巳犯寧夏都指揮焦
政戰死丁卯諭祭于謙復其子冕官冬十月丁未朱永
擊擒石龍賊平進永爵爲侯十二月甲寅李賢卒丙辰
以太常寺少卿兼翰林院侍讀學士劉定之入閣預機
務癸亥鎮守開原太監韋朗坐失律赦不問是月斷藤

峽賊復起是年哈密琉球安南烏斯藏衛拉特入貢
 三年春正月己卯大祀天地于南郊丙申命撫寧侯朱
 永爲平胡將軍充總兵官會楊信討瑪拉噶二月丁酉
 朔日有食之丁巳湖廣總兵官李震討破靖州苗三月
 戊辰召商輅爲兵部侍郎復入閣己巳瑪拉噶犯大同
 辛巳復開浙江福建四川雲南銀場以內臣領之夏四
 月以四川地屢震敕官吏修省遣使祭其山川乙巳錄
 囚癸丑復立團營六月戊申雷震南京午門敕羣臣修
 省辛酉命襄城伯李瑾爲征夷將軍充總兵官兵部尙
 書程信提督軍務太監劉恒監軍討山都掌蠻秋七月

乙酉停河南採辦九月辛未振湖廣江西饑十二月庚子左庶子黎淳追論景泰廢立事帝以景泰事已往且非臣下所當言切責之辛丑編修章懋黃仲昭校討莊景疏諫上元張燈杖謫有差是月程信破山都掌蠻平之是年琉球哈密占城烏斯藏入貢朝鮮獻海青白鵲諭母獻

四年春正月甲戌大祀天地于南郊三月甲子免湖廣被災秋糧甲申禁勲戚請民田夏四月庚寅慶雲伯周壽求涿州田許之丁巳錄囚陳文卒五月癸未遣使錄天下四六月丙午免江西被災秋糧辛亥開城賊滿俊

反陝西總兵官寧遠伯任壽巡撫都御史陳价討之甲寅慈懿皇太后崩秋七月癸酉命都督同知劉玉爲平虜副將軍充總兵官太監劉祥監軍副都御史項忠總督軍務討滿俊八月癸巳京師地震乙卯朱永代劉玉爲總兵官是月任壽陳价寧夏總兵官廣義伯吳琮及滿俊戰敗績都指揮蔣泰申澄被殺九月庚申葬孝莊睿皇后於裕陵辛酉振陝西饑壬申以地震星變下詔自責敕羣臣修省甲申給事中董旻御史胡深等九人請罷商輅及禮部尙書姚夔下獄杖之冬十月乙未項忠敗賊于石城伏羌伯毛忠戰死十一月壬戌瑪拉噶

犯遼東指揮胡珍戰沒是月項忠擊擒滿俊送京師伏
誅十二月己酉瑪拉噶犯延綏都指揮僉事許寧擊敗
之是年琉球烏斯藏哈密日本滿刺加入貢

五年春正月乙丑大祀天地於南郊三月辛丑賜張昇
等進士及第出身有差夏五月辛丑以禮部侍郎萬安
兼翰林院學士入閣預機務六月癸丑朔日有食之辛
酉錄囚秋八月辛酉劉定之卒冬十一月乙未瑪拉噶
犯延綏是年冬阿勒楚爾入居河套琉球哈密烏斯藏
滿刺加安南吐魯番入貢

六年春正月己丑大祀天地於南郊己亥大同總兵官

楊信敗瑪拉噶於胡柴溝二月辛未命大理寺少卿宋
旻侍郎曾翬原傑黃琛副都御史滕昭巡視畿南浙江
河南四川福建考察官吏訪軍民疾苦其餘直省有巡
撫等官者命亦如之丁丑禱雨於郊壇戊寅振廣西饑
三月甲申免湖廣山東被災稅糧壬寅詔延綏屯田命
朱永爲平虜將軍充總兵官太監傅恭顧恒監軍王越
叅贊軍務備阿勒楚爾於延綏夏五月丙申振畿內山
東河南饑丁酉王越敗阿勒楚爾於延綏東路六月戊
申朔日有食之秋七月己卯皇子祐檯生壬午朱永敗
阿勒楚爾於雙山堡丙戌命都御史項忠侍郎葉盛振

畿內饑民都督李景撫治屯營甲辰總兵官房能敗阿勒楚爾於開荒川是月免南畿四川被災稅糧八月辛亥振山西饑癸丑以水旱相仍下詔寬卹冬十月免畿內河南山東被災稅糧十一月癸未荆襄流民作亂命項忠總督河南湖廣荆襄軍務討之是月博勒呼渡河與阿勒楚爾合十二月庚戌遣使十四人分振畿輔是年琉球哈密烏斯藏入貢

七年春正月辛巳命京官五品以上及給事中御史各舉堪州縣者一人丙戌大祀天地于南郊是月立漕粟長運法三月增設蕪湖荊州杭州鈔關夏四月己巳錄

四五月辛巳瘞京師暴骸秋八月甲辰振山東浙江水
災閏九月己未浙江潮溢漂民居鹽場遣工部侍郎李
顥往祭海神修築堤岸冬十月乙亥以王恕爲刑部侍
郎總理河道十一月甲寅立皇子祐極爲皇太子大赦
已未荆襄賊平流民復業者一百四十餘萬人十二月
甲戌彗星見下詔自責敕羣臣修省條時政得失壬午
彗星入紫微垣避正殿撤樂御奉天門聽政甲申始召
見閣臣於文華殿召朱永還命王越總督延綏軍務辛
卯減死罪以下是年伽嘉色稜入居河套與阿勒楚爾
合安南黎灝攻占城破之琉球安南入貢

八年春正月庚戌大祀天地于南郊癸亥皇太子薨是月延綏叅將錢亮禦瑪拉噶於安邊營敗績都指揮栢隆陳英戰死伽嘉色稜犯固原平涼二月丙子預徵山西河南明年賦三月癸丑賜吳寬等進士及第出身有差夏四月京師旱運河水涸癸酉遣使禱於郊社山川淮瀆東海之神乙酉錄囚丁亥遣使錄天下四五月癸丑命武靖侯趙輔爲平虜將軍充總兵官節制各邊軍馬同王越禦伽嘉色稜秋九月丙午諭安南黎灝還占城侵地冬十一月己酉以寧晉伯劉聚代趙輔爲將軍屯延綏十二月癸酉振京師饑民是年博勒呼伽嘉色

稜屢入安邊營花馬池犯固原寧夏平涼臨鞏環慶通渭琉球哈密安南入貢

九年春正月丁未大祀天地於南郊王子劉聚王越敗伽嘉色稜於漫天嶺是月吐魯番素爾坦阿里破哈密據之三月畿南山東大饑民相食夏四月辛酉朔日有食之甲子福餘三衛寇遼東總兵官歐信擊敗之戊辰盡免山東稅糧瘞京師暴骸壬午閱武臣騎射於西苑秋七月壬辰巡撫延綏都御史余子俊敗伽嘉色稜於榆林澗九月辛卯鎮守浙江中官李義杖殺寧波衛指揮馬璋詔勿問庚子王越襲們都埒博勒呼伽嘉色稜

於紅鹽池大破之諸部漸出河套冬十一月丁酉復閱
騎射於西苑是年免湖廣畿內山西南畿陝西被災稅
糧振畿內陝西饑振山西者再山東者三哈密琉球暹
羅入貢

十年春正月丁亥朔振京師貧民丁酉大祀天地於南
郊癸卯命王越總制延綏甘肅寧夏三邊駐固原丙午
召劉聚還三月免南畿湖廣被災秋糧夏五月戊申申
藏祿書之禁是月免山西陝西被災秋糧閏六月乙巳
築邊牆自紫城砦至花馬池秋七月甲寅免江西被災
秋糧八月辛卯命都督同知趙勝爲平虜將軍充總兵

官太監劉恒覃平監軍討伽嘉色稜九月癸丑朔日有食之乙卯免南畿水災秋糧冬十一月丙子免河南被災稅糧十二月己丑罷寶慶諸府採金甲午錄祆書名示天下是年琉球烏斯藏吐魯番入貢

十一年春正月癸亥大祀天地於南郊二月甲申禁酷刑三月壬子賜謝遷等進士及第出身有差辛未彭時卒夏四月乙酉以吏部侍郎劉珣禮部侍郎劉吉並兼翰林學士入閣預機務壬辰乾清門災己亥錄囚五月丁卯始召見皇子祐檣於西內癸酉免湖廣被災秋糧秋八月辛巳浚通惠河丁亥們都埒伽嘉色稜遣使來